

საკრედიტო ლიმიტით სარგებლობის ძირითადი პირობები

1. გამოყენებული ტერმინები

- 1.1. საბარათე ანგარიში – ბანკში გახსნილი კლიენტის ანგარიში, რომელზეც შესაბამის განაცხადში მითითებული ოდენობით დაიშვება საკრედიტო ლიმიტი („დაშვებული საკრედიტო ლიმიტი“) და აისახება ბანკის მიერ გაცემული საერთაშორისო საბანკო ბარათით (შემდგომ „ბარათი“) შესრულებული ოპერაციები.
- 1.2. ათვისებული ლიმიტი - დაშვებული საკრედიტო ლიმიტის ფარგლებში გახარჯული საკრედიტო ლიმიტი.
- 1.3. გახარჯული საკრედიტო ლიმიტი - დაშვებული საკრედიტო ლიმიტის საფუძველზე კლიენტის მიერ მიღებული/გადახდილი თანხები და შესაბამისი საკომისიო (განაღების და ა.შ.), ამასთან მხარეებისათვის ცნობილია რომ განაღების საკომისიოს გათვალისწინებით, გახარჯული ლიმიტი შეიძლება აღემატებოდეს დაშვებული ლიმიტის ოდენობას.
- 1.4. საპროცენტო სარგებელი – განისაზღვრება შესაბამისი დანართით (ტარიფები) და არის ათვისებულ საკრედიტო ლიმიტზე დარიცხული პროცენტი.
- 1.5. მინიმალური გადასახადი – საკრედიტო ლიმიტით სარგებლობისას კლიენტის მიერ გადახდის თარიღისათვის/თარიღამდე გადასახდელი თანხის ოდენობა რომელიც შეადგენს ბილინგის დღისათვის გახარჯული საკრედიტო ლიმიტის 10 (ათი) პროცენტს, დარიცხულ საპროცენტო სარგებელს და პირგასამტეხლოს (მათი არსებობის შემთხვევაში), ამასთან თუ გახარჯული ლიმიტი აღემატება დაშვებულ ლიმიტს, მინიმალური გადასახდელი სრულად მოიცავს მათ შორის სხვაობას, ხოლო 10 (ათი) % დაანგარიშდება დაშვებული ლიმიტიდან.
- 1.6. გადახდის დღე – ბილინგის დღიდან 25_ე დღე. თუ აღნიშნული თარიღი ემთხვევა არასამუშაო დღეს, მაშინ გადახდის დღედ მიიჩნევა შემდეგი სამუშაო დღე.
- 1.7. ბილინგის დღე - ყოველი კალენდარული თვის 5 რიცხვი.
- 1.8. ვადაგადაცილება - გარემოება, როცა მინიმალური გადასახადი გადახდილი არ იქნება გადახდის დღის 21_ საათამდე.
- 1.9. სამუშაო დღე - წლის ნებისმიერი კალენდარული დღე, გარდა შაბათ-კვირისა და საქართველოს კანონმდებლობით გათვალისწინებული უქმე დღეებისა.
- 1.10. ვადაგადაცილებული დავალიანება - კლიენტის დავალიანება ბანკის წინაშე, რომელიც არ არის დაფარული წინამდებარე პირობით გათვალისწინებულ წესით და ვადებში.
- 1.11. ბარათის ბლოკირება - კლიენტის მიერ წინამდებარე პირობების დარღვევისათვის საბარათე ანგარიშზე ოპერაციების წარმოების დროებით შეჩერება (ბარათი თავსდება ლოკალურ სტოპ-სიაში, ხოლო ცალკეულ შემთხვევაში, ბანკის შეხედულებისამებრ - საერთაშორისო სტოპ-სიაში).

2. საკრედიტო ლიმიტის დაფარვის წესი

- 2.1. საბარათე ანგარიშზე წარმოქმნილი დავალიანების (მინიმალური გადასახადის) ყოველთვიურად დაფარვა სავალდებულოა გადახდის თარიღისათვის¹, წინააღმდეგ შემთხვევაში:
 - 2.1.1 კლიენტს დაეკისრება ერთჯერადი პირგასამტეხლო 20 ლარის ოდენობით და ყოველ ვადაგადაცილებულ დღეზე ვადაგადაცილებული მინიმალური გადასახადის 0.5%-ის ოდენობით. ათვისებულ საკრედიტო ლიმიტს რომლის დაფარვა არ მოხდა გადახდის დღისათვის, დაერიცხება წლიური საპროცენტო სარგებელი ტარიფების შესაბამისად, 365 კალენდარულ დღეზე გაანგარიშებით.

¹ თუ გახარჯული ლიმიტი აღემატება დაშვებულ ლიმიტს, მათ შორის სხვაობის დაფარვის ვალდებულება კლიენტს ეკისრება სხვაობის წარმოშობისთანავე და მისი გადახდის ვალდებულება არ გადავადდება გადახდის თარიღამდე.

- 2.2 თუ საკრედიტო ლიმიტით სარგებლობის დროს დაშვებულ და გახარჯულ საკრედიტო ლიმიტებს შორის წარმოიშვა სხვაობა, აღნიშნულ სხვაობას, წარმოშობიდან ყოველ ვადაგადაცილებულ დღეზე დაერიცხება პირგასამტეხლო 0,1%-ის ოდენობით.
- 2.3 გადახდის თარიღიდან 30 დღის ვადაში მინიმალური გადასახადის გადაუხდელობის შემთხვევაში ბანკი განახორციელებს ბარათის ბლოკირებას. კლიენტს ეკისრება ბარათის ბლოკირების საკომისიო (ასეთი არსებობის შემთხვევაში).
- 2.4 წინამდებარე პირობების 2.3 პუნქტში მითითებული ვადის შემდეგ მინიმალური გადასახადის გადაუხდელობა ბანკს ანიჭებს უფლებას შეწყვიტოს წინამდებარე პირობით განსაზღვრული მომსახურება და მოითხოვოს გახარჯული საკრედიტო ლიმიტის, დარიცხული საპროცენტო სარგებლის და პირგასამტეხლოს დაუყოვნებლივი დაფარვა.
- 2.5 დავალიანების დაფარვისას პირველ რიგში იფარება დაშვებულ და გახარჯულ ლიმიტს შორის არსებული სხვაობა (ასეთის არსებობის შემთხვევაში), დარიცხული პირგასამტეხლო, საპროცენტო სარგებელი და გახარჯული საკრედიტო ლიმიტი. აღნიშნული რიგითობა შეიძლება შეიცვალოს ბანკის შეხედულებისამებრ.
- 2.6 კლიენტი წინასწარ აცხადებს თანხმობას ბანკის სრულ უფლებაზე, საბარათო ანგარიშზე დავალიანების წარმოქმნისთანავე კლიენტის მიერ ბანკში გახსნილი სხვა ანგარიშებიდან კლიენტის დამატებითი აქცეპტის გარეშე ჩამოწეროს წინამდებარე პირობების შესაბამისად წარმოქმნილი ნებისმიერი სახის დავალიანება. თუ დავალიანების თანხა და ანგარიშებზე რიცხული თანხა სხვადასხვა ვალუტაშია, ბანკი თავად განახორციელებს კონვერტაციას კლიენტის ხარჯზე, გადახდის თარიღისათვის ბანკის მიერ დადგენილი კომერციული კურსით.

3. განსაკუთრებული პირობები

- 3.1. ბარათის განახლება მოხდება კლიენტის მოთხოვნის საფუძველზე. ბარათის განუახლებლობის შემთხვევაში პროცენტის/პირგასამტეხლოს დარიცხვა და არსებული დავალიანების დაფარვა გრძელდება წინამდებარე პირობების შესაბამისად.
- 3.2. ბანკი და კლიენტი დაიცავენ წინამდებარე პირობების და მასთან დაკავშირებული სხვა ურთიერთობის კონფიდენციალობას იმის გათვალისწინებით, რომ აღნიშნული შეზღუდვა არ შეეხება:
 - ა) იმ ინფორმაციას, რომელიც არის ან გახდება საჯაროდ ხელმისაწვდომი მხარეთაგან დამოუკიდებლად.
 - ბ) ინფორმაციას, რომლის მოპოვებაც შესაძლებელია სხვა წყაროებიდან.
 - გ) ინფორმაციას, რომლის გამჟღავნებაც მოხდება მხარის მიერ კანონის მოთხოვნათა შესაბამისად. მიუხედავად ამ მუხლით გათვალისწინებული შეზღუდვებისა, წინამდებარე პირობების საფუძველზე, კლიენტი უფლებამოსილებას ანიჭებს ბანკს, კლიენტთან და წინამდებარე პირობებით ნაკისრ ვალდებულებებთან დაკავშირებული ნებისმიერი ინფორმაცია (პოზიტიური და/ან ნეგატიური), გადასცეს სს „კრედიტინფო საქართველოს“ (რეგისტრირებული 14.02.2005 წ. მთაწმინდა-კრწანისის რაიონული სასამართლოს მიერ, რეგისტრაციის #06/5-51) მონაცემთა ბაზაში შესატანად, რის საფუძველზეც ეს ინფორმაცია შესაძლოა გახდეს საჯარო და ხელმისაწვდომი სხვა პირთათვის. ასევე მოიძიოს კლიენტის შესახებ ინფორმაცია აღნიშნული მონაცემთა ბაზიდან.
- 3.3. ბარათთან დაკავშირებით მხარეთა სხვა უფლებები და მოვალეობები ასევე რეგულირდება საბანკო ბარათით მომსახურების ძირითადი პირობებით, აღნიშნულ და წინამდებარე პირობებს შორის კოლიზიის შემთხვევაში უპირატესობა ენიჭება წინამდებარეს.
- 3.4. თუ საკრედიტო ლიმიტით სარგებლობის ვადის გასვლამდე ერთი თვით ადრე ბანკი არ შეატყობინებს კლიენტს საკრედიტო ლიმიტით სარგებლობის უფლების შეწყვეტის შესახებ, საკრედიტო ლიმიტით სარგებლობის ვადა გრძელდება ერთი წლით. ეს წესი მოქმედებს ყოველი ერთწლიანი პერიოდის დასრულების შემდეგ.

4. მხარეთა უფლება-მოვალეობანი

- 4.1. ბანკი უფლებამოსილია:

- 4.1.1. კლიენტის განცხადების საფუძველზე მიიღოს გადაწყვეტილება საკრედიტო ლიმიტის გაზრდის ან შემცირების შესახებ.
 - 4.1.2. კლიენტის საბარათე ანგარიშზე ვადაგადაცილებული დავალიანების არსებობის შემთხვევაში მოითხოვოს კლიენტის ნებისმიერი აქტივის რეალიზაცია.
 - 4.1.3. მოსთხოვოს კლიენტს საკრედიტო ლიმიტის უზრუნველყოფა.
 - 4.1.4. ცალმხრივად შეცვალოს წინამდებარე პირობები და ტარიფები და განათავსოს ისინი შეცვლილი სახით ბანკის ვებ გვერდზე ან წინამდებარე პირობებით გათვალისწინებული წესით შეატყობინოს კლიენტს. საპროცენტო განაკვეთის ცვლილების შესახებ კლიენტს ეცნობება ცვლილების განხორციელებამდე არანაკლებ ერთი თვით ადრე.
 - 4.1.5. ცალმხრივად შეაჩეროს/გააუქმოს საკრედიტო ლიმიტი და კლიენტისაგან მოითხოვოს გახარჯული ლიმიტის დაბრუნება მასზე დარიცხულ პროცენტთან და პირგასამტეხლოსთან ერთად, თუ:
 - 4.1.4.1. კლიენტი დაარღვევს წინამდებარე პირობებს.
 - 4.1.4.2. გაუარესდება კლიენტის ფინანსური მდგომარეობა ან ბანკს მიაჩნია, რომ შეიქმნება ამგვარი გარემოების დადგომის საფრთხე.
 - 4.1.4.3. კლიენტის მოქმედება მიმართულია ბანკის მოტყუებისკენ.
 - 4.1.4.4. კლიენტი არ მოახდენს საკრედიტო ლიმიტის უზრუნველყოფას, ბანკის შესაბამისი მოთხოვნის შემთხვევაში.
 - 4.1.6. გააუქმოს საკრედიტო ლიმიტი, თუ კლიენტმა 6 თვის განმავლობაში არ ისარგებლა დაშვებული ლიმიტით.
 - 4.1.7. ვადაგადაცილებისას განახორციელოს ბარათის ბლოკირება.
 - 4.1.8. უარი განაცხადოს საკრედიტო ლიმიტის გაზრდის შესახებ კლიენტის მოთხოვნის დაკმაყოფილებაზე.
 - 4.1.9. წინამდებარე ხელშეკრულებიდან გამომდინარე მოთხოვნის უფლების მესამე პირისათვის დათმობის შემთხვევაში, კლიენტის შესახებ სრული ინფორმაცია გადასცეს აღნიშნულ მესამე პირს.
 - 4.1.10. კლიენტის შესახებ ინფორმაცია გამოიყენოს ვითიბი ჯგუფის ჯგუფური ანგარიშგების შედგენის მიზნებისათვის.
- 4.2 კლიენტისათვის პროცენტის, პირგასამტეხლოს/საკომისიოს დაკისრება/გადახდევენება წარმოადგენს ბანკის უფლებამოსილებას და არა ვალდებულებას. შესაბამისად, ბანკი უფლებამოსილია არ მიიღოს გადაწყვეტილება კლიენტისათვის მათი სრულად ან ნაწილობრივ დაკისრების შესახებ.
- 4.3 კლიენტი უფლებამოსილია:
- 4.3.1 მიმართოს ბანკს თხოვნით საკრედიტო ლიმიტის გაზრდის ან შემცირების შესახებ.
 - 4.3.2 წარადგინოს ბანკში პრეტენზიები თავსართში მითითებული ფორმებით.
- 4.4 კლიენტი ვალდებულია:
- 4.4.1 საკრედიტო ლიმიტის მოქმედების ვადის განმავლობაში განახორციელოს ყოველთვიური მინიმალური გადასახადი გადახდა.
 - 4.4.2 კლიენტის მიერ ბანკში გახსნილ ანგარიშებზე განხორციელებული ნებისმიერი ჩარიცხვიდან პირველ რიგში დაფაროს ბანკის მიმართ არსებული დავალიანება.

5. დასკვნითი დებულებები

- 5.1. კლიენტი ანიჭებს ბანკს უპირობო უფლებას მასზედ, რომ მიიღოს კლიენტის შესახებ ინფორმაცია სახელმწიფო სერვისების განვითარების სააგენტოდან.
- 5.2. ბანკი ნებისმიერ შეტყობინებას, მათ შორის მინიმალური გადასახადის შესახებ ინფორმაციას კლიენტს უგზავნის მის მიერ მითითებულ ტელეფონის ნომერზე მოკლე ტექსტური შეტყობინების სახით. კლიენტს ასევე ეკისრება ვალდებულება, რომ მინიმალური გადასახადის შესახებ ინფორმაციას გაეცნოს ინტერნეტ ბანკში, მისთვის გადაცემული მომხმარებლის სახელის და პაროლის გამოყენებით. ტელეფონის ნომერზე გაგზავნილი შეტყობინებები კლიენტის მიერ ჩაითვლება მიღებულად თუ ტელეფონის ნომერი გამორთულია ან გასულია მომსახურების ზონიდან,

ან თუ ტელეფონის ასეთი ნომრით აღარ სარგებლობს კლიენტი და ახალი ნომრის შესახებ მას ბანკისათვის წერილობით არ უცნობებია.

- 5.3. წინამდებარე პირობებით ნაკისრი ვალდებულებ(ებ)ის დარღვევის შემთხვევაში, დავალიანების კლიენტისაგან ამოღების მიზნებისათვის, კლიენტი უფლებამოსილებას ანიჭებს ბანკს კლიენტთან და წინამდებარე პირობებით ნაკისრ ვალდებულებებთან დაკავშირებული ინფორმაცია გადასცეს ასევე სხვა მესამე პირებს.
- 5.4. ნებისმიერი დავა, გამომდინარე ამ ხელშეკრულებიდან და მასთან დაკავშირებული აქცესორული ხელშეკრულებიდან, დაკავშირებული მათ გაუქმებასთან, შეწყვეტასთან, ბათილობასთან, ხელშეკრულებიდან გასვლასთან და მისგან გამომდინარე ნებისმიერ შედეგთან (მათ შორის უზრუნველყოფის ღონისძიებათა გამოყენებასთან), ასევე წინამდებარე პუნქტით გათვალისწინებული საარბიტრაჟო დათქმის ნამდვილობასა და არსებობასთან დაკავშირებული საკითხები განსახილველად და საბოლოო გადაწყვეტილების მისაღებად გადაეცემა შპს „საქართველოს საარბიტრაჟო პალატას“ (საიდენტიფიკაციო N205267389), რომლის იურისდიქციას მხარეები აღიარებენ ანულირების გარეშე. აღნიშნული არბიტრაჟი საქმეს განიხილავს თავისი დებულებით დადგენილი წესით. საქმეს, მისი სირთულიდან გამომდინარე, განიხილავს არბიტრაჟი ერთი ან სამი არბიტრის შემადგენლობით. არბიტრებს ნიშნავს და მათ რაოდენობას განსაზღვრავს არბიტრაჟი. არბიტრაჟის მიერ მიღებული გადაწყვეტილება სასარჩელო მოთხოვნის უზრუნველყოფის შესახებ ექვემდებარება აღსრულებას არბიტრაჟის მიერ გაცემული სააღსრულებო ფურცლის საფუძველზე და არ საჭიროებს სასამართლოს მიერ ცნობასა და აღსრულებას.
- 5.5. მხარეები დამატებით იღებენ ვალდებულებას მისამართის ან/და ფაქტობრივი ადგილსამყოფელის შეცვლის შემთხვევაში აცნობონ იგი არბიტრაჟს, წინააღმდეგ შემთხვევაში არბიტრაჟის მიერ კორესპონდენცია გაგზავნილი იქნება წინამდებარე ხელშეკრულებით გათვალისწინებული მისამართის მიხედვით და კორესპონდენცია (მათ შორის გზავნილი, გარკვეულ საარბიტრაჟო მოქმედებათა შესახებ შეტყობინება, განკარგულება, გადაწყვეტილება და ა.შ.) ჩაითვლება ჩაბარებულად (შესაბამისი თანმდევი სამართლებრივი შედეგებით).